

Au an dr Faasnaacht soll das Gsetz jetzt walte,
Dass d Veloofaarer kenne uffschalte.
So dien mir als Hälffer am Cortège flingg
D Wääg marggiere, gänn mit Schilder Wingg,
Weeli Route isch diräggt und au konfoorm,
Für Öko-Gfäärt in korräggtter Noorm.
En anderi Uffgoob isch z vermyyde,
Dass miir stundelang im Stau mien lyyde.
Drum geen mir nimm zem Mässeblatt,
Die Schlaufe isch scho lang fir d Katz.
Vom Wettstaiblatz drum ooni z waarte,
E diräggti Streggi uf dr Kaarte.
Gniese d Rueh in de Glaibaasler Gasse,
Faare däa Wääg ooni Stress und glasse.
Doch am Claarablatz isch d Rueh ufs Mool verbyy.
Jetzt muesch kämpfe um di Rächt, de merggsch es glyy,
Gmääss däm Gsetz, doo simmer ganz penyybel,
Waggiswääge sinn nid kompaatybel.

Soll Dy Bueb mee als nur Fasnacht mache
könne, kumm diräggt am 16. oder 23. März
vo 2 bis 4 an Schnubberapéro in unsere
Käller am Aubärg 2b oder informier dy unter:
www.jungi-stainlemer.ch.

Am Fritig und Samschtig, 15. und 16. März 2019
isch Noochwuggswärbig vo dr 1. Lektion im Zält
uff em Barfi.



Gugge jaage mr mit de Velooglogge,
Au die bringen is doch nur ins Stogge.
Bim Umsetze vom Bschluss gitts gar kai Zrugg,
Nur uns elai gheert die Mittler Brugg.
Dr Määrtplatz wird als nöggchts bliant,
Dass kai Schysdräggiigli deert flaaniert.
D Schääse solle dr Rosshoof sueche,
Deert kenne si e Paarggblatz bueche.
Ins Gläbbergässli leege mir e Spuur,
Drnoo sinn d Schleeger deert in grosser Druur.
Uf dr Gass hänn si nyt verloore,
Sunscht griege si e baar an d Oore.
Au d Glygge sotten is dr Voordridd loo.
Denn d Stainen isch mit de Veloo doo!
D «Rolling Stones» längge nundefaane,
D Faasnaacht in die rächte Baane!



Mir stimmen ab, s isch nid zem Lache,
iiber allergättig glatti Sache:
E Byspiil, wo de di kasch bsinne draa,
Isch, eb d Kieh äggscht solle Heerner haa.
Au wott s Volgg dr Bund in d Pflicht jetzt näa,
Zem de Veloo mee Rächt bim Faare gää.
Drum gheert in d Verfässig sunneglaar:
Wenn de trampsch, hesch Voordridd, bisch dr Staar!
Au duet me d Gsundhait feerdere – und lägg!
S Klima schoone, will me macht kai Drägg.
«Drooteesel zerscht!» isch unser Motto,
S Veloo isch dr Säggser jetzt im Lotto!

Rolling Stones



ALTI STAINLEMER 2019

Nur Staalross sinn in dääre Stadt no ffroggt,
 Bisch duu nid «grien», wirtsch s ganz Joor bloggt.
 Reegle wäärde yygfiehr reschtriggtyyv,
 Daas maacht dr Verkeer erscht attraggtyyv.
 D Sicherheit isch soo gaanz wichtig,
 Alli draage braav und iibersichtlig:
 Lychtweschte, Lämpli und au Wimpel,
 Helm und Blingger hett e jeede Simpel.
 E Verdrängigskampf uf unsre Stroosse
 Isch d Foolg fir die Glaine und die Grosse:
 Faarsch uf em Trottoir, isch das glyych,
 Uns Velofaarer gheert das Ryych!
 Machs als Fuessgänger denn doo Krach,
 Griegsch duu vo uns wäg däm uf s Dach!
 Und wotts duu di drgeege weere,
 Deerfe mir uns go beschweere.
 D Schuggerey hett jetzt d Dewyysse,
 Ooni Veloo bisch e Fyysse.
 Iiberhaupt nimm rächtens isch – dasch glatt,
 S Autifaare in dr Innestadt.
 Probiersch es drotzdäm, wird's fataal,
 Griegsch e Buess ganz maximaal.
 Wirtsch abschleppt uff die aige Keschte,
 Dasch grächt und nadyrlyg s Beschte.
 Als Autifaarer ischs verbyy,
 Wägwyysse zaige nur in Rhyy.
 Beschiilderige sinn veloofrindlig,
 Grien gitts fir Auti nur no stindlig.
 D Ampelmännli sinn entsetzt,
 Dur Veloo wäärde sii ersetzt.
 Motoorfaarzyyg sinn die falschi Soorte,
 Dr Ring isch zem Veloo-«Highway» woorde.
 Und ruggsch du uns deert z fescht uf d Pelle,
 Griegsch ains uf d Liebe mit dr Velookelle.
 So sinn alli Konsequäänze
 Verkeertechnisch ooni Gräänze:
 Am Kloschterbäärg – das duet nid gfalle!
 Kunnsch in e Veloodaarfalle,
 Uf dr Wettstaibrugg baut Schindler,
 E Veloolift fir diggi Kinder.
 Dr Rhyysprung leen mir sofort schliesse,
 Dass en d Mountainbiker kenne gniesse.
 Wänn mir dr Koolebäärg no speerre,
 Kaa sich d BVB nid weere.

Anstell vo Byyljeeautomaate,
 Kamme glyy e nei Syyschteem lo staarte:
 E Stroomtangstell wiird installiert,
 Als E-Bike bisch nimm schigganiert.
 Dr Wessels maint druze begaischteret:
 «Toll, dass miär da alles meischteret!
 Uss Auto- mached miär jetzt «Velobaane»,
 Ussfüere! Sofort! – Nöd lang ummepläne!
 Wott ein so mit em Wäschpi staarte,
 Ka dää vo uns kai Loob erwaarte.
 Mit em grälle Veloolicht wird bländet,
 Bis dää freywillig wiider wändet.
 S hett kai Trotti-Trottel Voorfaart mee
 Vom Zolli bis zer Kunschti Eglisee.
 Und will äär das nid aggzeptiere,
 Kamme ooni «Lime» si Bräms bloggriere.
 Faarsch mit em Deff zem Spaaledoor,
 Hänn mir drfiir kai offe Oor.
 Parggiersch dää Geppel glyych, du Schelm,
 Saiche miir zer Stroof in Helm.
 Schlyycht sich aine aa uf unsrer Spuur,
 Mit em Buschiwaage, simmer stuur.
 Gänn däm Goof bitz Rizinuss,
 Dä soorgt fiir Aadribb «Veloo plus».
 Mechtsch duu hitt e feyni Pizza ässe?
 D Liiferig per Smaart kaasch graad vergässe!
 E Caargo-Bike bringt sii im Nuu dir haim,
 Fir d Veloo-Lobby sinn das kaini Draim.
 Steere duet sii nur d Elisabeete,
 Wäg de Randstai, wo se kennte deete.
 Nutze dien die nur de Drämmli,
 Die sinn iiberflissig nämmli.
 Im Rollstuel – kasch ys no so bitte,
 Bisch im Wäg – mir sinn vom Deyfel gritte!
 Schupfe dii vom Peetersgraabe
 S Dootegässli ooben aabe.
 Zem Heernli wirtsch denn nimmi gfaare
 In däm altbekannte schwarze Kaare.
 Uf s Tandem hindedruff wirtsch gschnallt,
 Egal, ob diir daas denn no gfallt.
 So wirggt dy Abgang ganz gepfläggt,
 Und dr letschti Wäg isch gwiss koräggt.



- STAINLEMER 2019
- | | |
|-----------------|-----------------|
| 1 Stainekäller | 5 Chateau Lapin |
| 2 Duubeschiss | 6 Gambrius |
| 3 Schluggstuube | 7 Schiffländi |
| 4 Bermuda | 8 Adler |
| Dreyegg | 9 Rähhuus |

D Ladaärne-Uusstellig uff em Minschterplatz und d'Waage- und Reggwisyte-Uusstellig bi dr Kasääme sin vom Määntig znacht bis am Mittwuch demoorge!